

皇朝經世文新編

皇朝經世文新編卷二目錄

君德

希臘大帝亞力山大傳

羅馬皇該撒傳

得勝偉良傳

少言偉良傳

法皇拿破崙第一傳

俄皇大彼得傳

論俄皇游歷

記俄皇行事

德皇政策

論德皇為人

論比國王

美國共和黨擬舉總統

美新總統麥見尼傳

美國總統演說

民主榮歸頌

論暹王出遊

英人李提摩太附

英人李提摩太附

英人李提摩太附

英人李提摩太附

英人李提摩太附

英人李提摩太附

關名附

西女士滑校附

日人關名附

愛芝其亞附

日人關名附

日人關名附

日人關名附

關名附

英人關名

劉楨麟

暹王遊歷記

英人關名附

皇朝經世文新編卷二

順德麥仲華曼宣輯

君德

希臘大帝亞力山大傳

英人李提摩太附

上古之世歐洲人踪跡少亞洲人陸續居之當中國成周之世或在希臘境分立數小國或在羅馬境分立數小國而亞洲之波斯為第一大國蠶食鄰境直達地中海並非洲之埃及國亦皆隸其版圖至救世主降生之前四百九十年正中國孔子在世波斯皇大力巫師率師十一萬至歐洲欲取希臘國希臘止遣兵一萬禦之及戰波斯敗績大力巫師憤甚回國以後檄召通國之兵精心訓練者三年而大力巫師率其子賽爾即位以雪父之恥為己任遂統水陸兵二百六十四萬并軍中之服役長夫稱是以伐希臘希臘知波斯之必報前仇也水陸各險要早皆分兵設備有某隘者為波斯進兵所必由而奇險天成真有一夫當關萬夫莫開之勢故希臘止遣精卒三百合餘兵七千伏以待之及波斯兵全隊俱至雖眾無所用之大敗而退水路兵艦又值颶風覆沒者半波斯坐是不振後數十年希臘腓力在位欲合眾小國為一大國以伐波斯於是遣使分往眾小國游說百端而自練其兵為方陣假如有兵四十人分南北東西為四向可以人自為戰由十而百而千而萬皆為方式手中各執長鎗悉跪以待敵馬闖入無一能脫名之曰法郎司陣至今軍中猶用之迨軍法練熟而腓力卒亞力山大者腓力之子也生於救世主降生前三百五十六年幼而溺苦於學讀希臘國之意里亞書經追慕其先祖亞齊力士之謨烈刻意效之其授業之大師亞力士多特為西國第一名師西國古未有兩大並稱者亞力山大異日身為大帝先與亞力士多特大師一堂歡聚至今人艷稱之亞力山大年十六歲腓力即命為監國辦理畿疆庶政年十八歲又命率師出戰每戰輒勝而軍中仍不廢學業偶於深山邃谷間見有

異禽怪獸或至絕域聞有奇事歸必告諸亞力士多特以勘其理及年二十而腓力卒遂即王位國人藐之謂不能如其父之坐致太平也有謀叛者乃亞力山大機警如電光之照不俟亂成而兵已至拘叛黨盡殲之僅留名士頻大陸司一人而並宥其家自是通國皆安謐肅靜不敢復思叛亂矣救世主前三百三十四年率師三萬五千渡海至亞細亞洲盡取小亞細亞之地明年東至波斯敗其兵波斯皇遁亞力山大遂掠其家而取叙利亞地並埃及國全境而據之叙利亞之推羅海口人虐待希臘之戍兵亞力山大聞之怒拘推羅人二千縛而懸於樹旋別築京都即以己名名之今亞力山大城故趾猶新也既而波斯皇又以傾國之師來亞力山大率師迎拒大破其衆衆勝奪其屬地且兼并波斯之京城而巴比倫及蘇薩及白波利極富之都三亦皆望風降服亞力山大遂大富又東進至巴提亞所迭那直至印度勢如破竹無敢阻者旋渡印度大江破鐵路司之兵而旌旆遙指蘇特類江竟有盡吞印度之意時軍中有三大將微犯軍律顧罪不至死也亞力山大性嗜酒因醉而殺其一越日并其二而殺之士卒紛紛解體不願進征亞力山大因命造船渡回其凱旋之師而自由陸路至波斯京城其兵船則由印度大江過海入波斯大江旋自波斯之古京蘇薩府與亞力山大會亞力山大既罷兵乃務求善法以治其地創立章程有條不紊惟亞洲與歐洲人尚不能同心事多扞格亞力山大又創為互通婚媾之法已先聘波斯公主為后其將帥以下各官之未婚及悼亡者皆娶波斯大小官員之女下至兵丁亦各娶波斯女為妻然後民氣大和悉遵希臘之教令雖有一印度士子加拉奴司年七十歲自幼至老曾染疾至是忽病恐不能生即舉火自焚死此印度舊日陋俗之未革者然不足為病也時又有若干兵不願入伍亞力山大曰凡以從軍為苦者庸懦之夫也吾國中不願有若人遂逐之凡一萬人而率樂於戰鬥之精卒而歸及至哀撥他那亞力山大素極信用之臣害非司登死亞力山大不勝哀悼賜葬豐厚既而至巴比倫時救世主前三百二十三年也亞力山大欲在巴比倫更築京都蓋自亘古以來未有幅員如是之廣

者一時如亞細亞阿非利加歐羅巴諸洲除中國外凡屬有名之國無不傾心歸附奉為大帝其民衆亦皆真敬之如神明在旁觀者以為至此可安坐而享其成矣而亞力山大猶以為未已也不圖飲酒過甚肺疾大作內熱不可支越二旬病益劇命人昇至溪塘解衣而浴趣召大臣商議治國之事大驚務以用賢為本又越四日病已垂危然仍命人昇至祭壇親行祭禮病凡二十八日而卒年僅三十三歲按大帝在位不足十三年而建樹之隆功業之盛至此而極蓋開闢以來所未有也及卒國祚雖不永然其所分封之國一律皆用希臘文字亦可謂文教昌明無遠弗届者矣亞力山大卒後三百餘年救世主耶穌生於猶太國廣傳教法其門人雖皆猶太籍而新約全書亦皆用希臘文而後世好學之士更相襲用以為博古以是知亞力山大之流澤為彌長也

羅馬皇該撒傳

英人李提摩太附

羅馬歐西古名國也救世主降生以前七百餘年當中土周平王之世已卓然具開國規模逾二百年世家鼎盛權移於下寔至廢其君而別舉二人為肯蘇周年而一易肯蘇者譯言主也然亦僅擁虛位國有政事必先與諸世家議定始得施行後遂相沿為例肯蘇如五日京兆視同傳舍世家則父子相襲永無遷改大權旁落皆歸於世家矣希臘之興也羅馬仍弱不克振至救世主前二百六十四年始有外闢土地之舉得亞非利加洲北部之加特地及救主前二百年即中國興希臘戰勝於疆場間得其舊日開基之地時世家中有該撒者性機警而和易母族雖式微而襲其祖父之餘蔭號為強族年十四羅馬人已舉之為主祭官肯蘇心忌其能驅逐出境該撒遂下居小亞細亞旋欲投入軍營為海盜所擄月餘以計脫隱居一海島中肆志讀書年二十六歲始回羅馬府肯蘇久已易位衆又舉該撒在主祭之例該撒見窮黎庸集為壽衣食之資乃創為以工代賑法廣修宮室廟宇入解其餘有需工作之處咸役貧民而給以值家財已罄又多方借貸以益之歷年逋欠累

累而民心胥悅其待士卒也亦務各得其歡心初羅馬有名將甚於該撒為婁文行軍中咸欣戴之而不為世家所重故投閒置散以卒至是該撒塑其像優加供俸士卒之心亦皆悅服隸於羅馬之西班牙屢懷反側羅馬遣該撒巡撫其地一日人見其蹙然愁損詰之該撒嘆曰昔希臘大帝亞力山大年未三十而功成業就今我三十有九矣尚碌碌未有建樹年華豈能待人耶旋率精兵往征西班牙數月之間奏凱回朝眾遂舉為肯蘇時則羅馬攬大權者厥有二人一曰噴湃官拜大將軍曾立功於希臘國之亞細亞洲西部叙利亞而據其全地一曰哈喇蘇士羅馬第一富族也而與噴湃夙不相能該撒為之往返游說前嫌頓釋乃躬與二人歃盟曰自今以往我無爾詐爾無我虞有渝此盟明神殛之二人遂與該撒同心共事該撒又以其女字噴湃為室則大權分鼎足而三矣迨肯蘇任滿眾又命為加利亞巡撫加利亞者法蘭西國古名也當時剖分為數十小國日尋干戈該撒既至練兵三萬次第蕩平之又有異族人由今之德國境內來欲奪加利亞眾號三十六萬八千而在軍伍者實有九萬二十人該撒揮兵縱擊異族敗走旋即添兵踵至加利亞人洵懼該撒又擊却之次年比例時國與眾小國合而為一有眾三十萬來擾加利亞亦為該撒擊敗死者其眾俘擄五萬三千人俱賣之為奴僕羅馬府人聞該撒之立功異域也皆大歡喜甚至工徒罷業相與演劇酬神飲酒作樂以慶羅馬向來未有之奇功時則該撒年四十三歲矣次年又平加利亞西部獲船二百餘艘救主前五十五年該撒四十五歲率師渡海至英國界又定沿海之地數千里此為英國入國史紀事之始是年該撒之二友為羅馬肯蘇而該撒所平之地又叛聚眾三十萬來犯該撒該撒視師境外風馳電掣所過之地悉就蕩平且擄其酋長戮於羅馬府為質其罪重者斬之此為該撒立功之第八次自此以後十年中平小國者三百前後遇敵不下三百萬人該撒凡殺百萬人擄百萬人餘皆望風奔潰威名遍震於遐方及其功成名遂則又多設治法施恩德於瘡痍之後撫撫魂於震疊之餘各處畏威之餘轉而懷德該撒更築石路以通商賈民眾益和而羅馬府人

恐其難制誑之散軍歸伍而使解兵柄改歸噴湃統轄噴湃已與該撒有隙該撒覺其奸乃曰使噴湃解兵我亦撒伍否則不能如命時該撒所統之衆止五六千人徑率之以入羅馬府出榜諭於衆曰羅馬貧民久受富民之害而噴湃與哈喇蘇士又朝夕相爭使羅馬無一安甯之日我今來此欲上下相安民其毋恐百姓皆匍匐歸之噴湃遠遁至埃及諸世家俱隨之該撒乘船追至衆以為飛將軍從天而降也尋為該撒按籍誅夷鮮漏網埃及女王奇畧爬特拉為埃及亘古以來第一奇女子以其弟之奪其地也求該撒助之撒欣然允許亦即削平及回羅馬勳業鼎盛威遠播國中則世家盡滅大權獨歸一人羣遂奉以皇號然羅馬俗忌稱皇該撒乃曰我不願為皇祇願為該撒意直謂該撒之名尚貴於皇也由是西國留為口實稱其皇曰該撒英德法奧意諸國皆喜道之云當是時也羅馬大亂既平而國中法律尚復紊亂該撒乃脩明律法務使徧國畫一又造字為辣頂文令士子習之相沿至今凡著書用辣頂文者幾徧歐洲焉又立書庫藏書其中國之寒畯皆得入覽旋念羅馬府所捕之奴受苦過甚命安置於空閒之野使得自食其力蓋仁政之所見端也該撒猶以為未足欲使天下又安人民和謐乃極意經營未竟其志而習於舊俗之奸人忌其大權獨攬乃於大節日偽為求恩也者近其身而刺之傷重遂殞惜哉當考西國大有為之主高出尋常萬萬者希臘大帝亞力山大而外厥惟羅馬皇該撒亞力山大自希臘而東至亞細亞聲名文物炳著人蒙希臘文字遂通行於歐洲東部士子譯書無不以此為主故亞力山大之謨烈至今稱頌不衰該撒則創業羅馬而歐洲西北大半歸入版圖羅馬大一統之功非該撒孰能當之況文教尤盛於武功自其殂後千五百年歐洲西部士子猶敬惜辣頂文字聲稱不朽嗚呼若該撒者誠可與亞力山大並稱人傑也哉

得勝偉良傳

英人 李提摩太附

偉良瑞典人得勝其徽號也生於西歷一千二十七年初歐洲東南希臘國大帝亞力山大削平亞細亞洲之

西部歐南羅馬國皇該撒平歐洲希臘之各屬國並西南部並南非利加之北部曰耳曼皇沙厘曼從歐洲中土起偕該撒留遺羅馬之西半國立為羅馬西皇旋平歐洲北部沙厘曼之所以稱美者不在據地之多而在教化之盛偉良起於歐洲諾爾曼地即今瑞典國也按亞力山大之興當中華之戰國該撒之興當中華之炎漢沙厘曼之興當中華之李唐偉良之興當中華之趙宋一千四百年人傑挺生後先輝映亦盛矣哉諾爾曼地在歐洲之極北其土人漸次南徙入英入法入意入猶太諸國略似匈奴收游牧之族性皆好勝無論為商賈為工藝為兵卒總欲勝人而後已蓋又類回教之亞拉伯人而無卓識借人之識以為識溯回教起於唐時所到之地遇有才能之士必力迫以使之助已戰勝攻取皆賴其力諾爾曼人亦然惟尚知以禮延請不恃強力較勝於亞拉伯故人亦樂為之用比至歐南見沙厘曼所遺之法全以教民為主總主教又設教化民自念風未受學無以勝人乃先築禮拜堂較歐洲中土舊堂尤為華麗今故址尚存歐洲古屋無出其右者此亦好勝之一端也諾爾曼人本與英德二國人同一始祖西國總名曰丟等泥即譯言族類也偉良之父曾官法國有功封侯爵及偉良生八歲而父死在法宮中讀書其父之家臣紛亂無章家業中落兼之各龍侯強凌眾暴曰尋子戈偉良世襲之茅土亦為他人所佔及年二十銳意整頓又開拓其屬地即名之曰諾爾曼並使法國北部貳於己四方之人皆畏之各龍侯推為盟主是時英王與諾爾曼人已結婚姻英亂英王逃入法主於偉良家偉良聞諾爾曼人之在意大利立國也亦有自立為國之志乃謂英王曰君如聽我為主我必送君歸國未幾英王歸而背其言西歷一千六十六年偉良率師渡海侵英英王歿於陣偉良遂自立於英謂英之土地皆我有也分給隨往之諾爾曼功臣又分兵以鎮各處英人震怒莫敢與爭又擴一圍為田臘之所並將各府州縣土田疆界何處係某人營業皆勒成書存之宮中心猶未厭欲得法人土地先與法王書曰我為法侯本有采地其外亦宜歸我管轄法王不許偉良遂與法戰亂兵四起有房屋為兵火所焚者偉良騎馬而過馬傷於

火跳躍不能止偉良墜地傷重而死時西歷一千八百七十七年也在位二十一年偉良生平志大言大而又能大有為誠可謂雄才大畧之主矣其由法隨至英國之諾爾曼人偉良命之辦理教事會所用公牘皆取法文由是法文大興於英教會舊章每人歲輸銅錢一枚約值中國制錢數十文以為公費而盡納於羅馬總主教偉良既為英國主仍其舊制惟羅馬總主教欲偉良仿沙厘曼之故事尊主教為主諸大事悉聽裁制偉良不允其好勝又一端也故微號曰得勝

少言偉良傳

英人李提摩太附

繼得勝偉良而起者又有一偉良荷蘭人也生於西歷一千五百二十三年當明嘉靖之際時荷蘭當屬於西班牙偉良之祖世襲潘王居於法國東南境偉良年十一歲即能轄治其地而荷蘭之郡縣亦多有歸偉良所轄者遂為荷蘭第一世家當其幼時隨父奉復原教即華人所謂耶穌教也年十五歲時沙力第五皇帝禮聘入朝相助為理而其重之乃隨沙力入天主教二十六歲為西班牙將軍代西班牙王腓力與法王立和約法王告之曰沙力之子腓力已與吾商定欲除盡復原教中人君以為何如偉良聞之心甚不安而卒不贊一詞眾因名之曰少言偉良是時南亞美利加洲皆歸腓力統轄葡萄牙人亦畧地至亞細亞洲之印度中國一帶地方既而腓力並葡萄牙所畧之地而據之遂有統轄三洲之權勢歐洲自教皇之外莫有能與之並駕齊驅者西歷一千五百七十二年法王查理前立之約勒滅耶穌教人其在法境者共二萬人盡殺之腓力亦殺人如草芥以荷蘭為盡屬異端因命各處設官專治教人不問有罪與否但係入耶穌教者皆罪之較法王尤為慘酷此誠言古以來五洲之內第一大殘虐事而偉良則立意保護荷蘭之民因僞荷蘭人曰凡事照舊章辦理固無不可今逼令昧良改教且不問善惡均治以罪何足以服人心眾遂與腓力則盡發練兵至荷蘭圍困之偉良百計守禦而請救於他國他國懼腓力之淫威莫敢為左右袒者偉良則大築海塘以水灌腓力之營

西兵在城外無駐足始悉退荷蘭人咸呼偉良為父至一千五百八十一年荷蘭七省人民共立約曰昔日章程仍舊辦理我等仍宜服從若不但改教會舊程而又定新律以苛待荷蘭荷蘭萬不可從人心益固而荷蘭之國基已立腓力不能制然以跨有三洲權勢之腓力而不能制最爾之荷蘭乃大躁急下令曰有能殺偉良者予以二萬五千金並封以大爵一千五百八十四年有一人至偉良家以洋鎗擊偉良旋被荷官獲而殺之腓力不食言封其後為侯偉良雖死而荷蘭大定後漸昌大其民人又踵西班牙葡萄牙人遠泛外海之後廣亦東至印度蘇門答臘台灣澳洲並南非洲等處西歷一千六百二年荷蘭又創立大商局凡五十年之內除南美利加外南半球幾盡作荷蘭貿易地當時走海之國以荷蘭為第一中國人稱之曰紅毛後葡萄牙所得亞細亞之地亦大半歸於荷蘭至今荷蘭雖無從前之大而但即亞洲所統之地以較本國境土尚多五十餘倍此皆偉良之大功也

法皇拿破崙第一傳

英人李提摩太附

拿破崙者法國皇也性強悍好戰最善用兵生於西歷一千七百六十八年即中國乾隆三十二年其父為律師精刑名之術初法國民多貧困朝廷亦無善法以養育之民為飢寒所迫皆叛其上遂改為民主之國由眾公舉賢能以為國王時拿破崙投軍為哨官每戰輒勝其曹屬年二十八歲國家命將兵四萬以攻意大利糧餉不足士卒衣履不完而戰無不勝未及一月意國薩丁尼亞人皆降於法其援意之奧兵二年中與法十八戰無不挫敗意大利遂屬於法教皇徵兵以拒拿破崙亦為所敗教皇逃而免及回法京人咸稱之為古今第一名將拿破崙又欲侵英國定計以為宜先平埃及乘勝可得英之印度則破英易如反掌矣拿破崙年三十三歲率師至埃及英人知其謀先遣水師提督內利森戍埃及盡擄拿破崙之兵船拿破崙進攻叙利亞城英人亦先守之拿破崙固以重圍而兩月不能破始悟不能得印度班師回國則朝政紊亂強鄰四起意大利亦為

他人所據民間咸議以為拿破崙於二年之間連奪大國誠大有為之才而不令其自主法國何以振興也遂公舉暫為法國之主時年三十一歲矣拿破崙既自主乃謀先與英人立和約英人以為一則拿破崙立約不誠中必有詐一則法國之民皆欲與各國王為敵非令其悔改此心雖和不久遂不許法和而與俄奧立約次年為西歷一千八百十年拿破崙率兵攻意夏復奪而據之又破奧京未幾俄人與英渝盟暗與拿破崙立約而遵法之意得由陸路以侵印度丹麥瑞典兩國亦同盟約西班牙荷蘭亦懼而從之拿破崙與之約曰我數國兵船盡在海內游行不准英人稽查蓋拿破崙別有深謀也英人知諸國皆與同盟又陰知拿破崙必借丹瑞諸國旗懸於法船以運軍械急派水師提督至波羅的海與各國戰而敗之並獲丹國兵船時俄皇意欲新君亞力山大第一即位不肯發兵侵印度而欲排英法二國之難英人亦不欲戰乃於一千八百一年大會歐洲各國立約罷兵拿破崙既無外衅即竭力以脩內政而以安慰教會為首務方法之亂也教會最甚至是重行設立奉教者皆感戴之又念法國各地風俗不同律例亦異乃改訂新章使之畫一遵守又築陸路疏河道以便民用是時英國兵船額設八百號可載水師一十二萬人多於前者幾一倍法兵船則反少於前一半英國水陸之兵前止八萬名者今已有五十萬法兵前止二十七萬者今又加至一百萬英國練兵所費及助他國用兵之費一年多至英金六十萬磅法國兵餉則共需二千二百萬磅英國國債前止二百二十四兆磅數年之內增至四百八十四兆磅幸英國商務逐漸繁盛強人意者則國債之費不堪設想矣按英之商務前止有英金四千萬磅至是則增至七十萬磅而法國生意則全行收閉蓋懼英兵船擄掠之故也罷兵未及二年而英法之兵端又起英人與俄羅斯瑞典奧大利亞諸國同盟其誓詞若謂深知拿破崙第一大有席捲歐洲之志故我諸國宜同心以敵之而西班牙荷蘭意大利瑞士並日耳曼眾小國則助拿破崙亦聯盟約日耳曼列邦中有普魯士國者袖手旁觀將視強弱以為向背拿破崙默計諸國所恃者英也若先攻英而破之則歐

洲必皆解體矣於是率兵十五萬潛令商船二十號藏械渡海而以兵船六十號護之英人知之急命將升率舟師截於半途法船四散拿破崙大怒即變計先破他國然後并力於英乃率兵十八萬伐奧既至奧京破其城據掠一空奧之軍械糧糧均為法有俄羅斯遣兵救奧與法人遇法人乘勢勦殺俘俄兵八萬遂於一月之內連破普國都城搜括官民財物幾若籍沒家產也者蓋欲使其窮乏不能振興自不暇練兵助虐也其時歐洲全境惟英及俄尚足父老與法人相抗一千八百七年拿破崙率兵十萬伐俄俄師禦之連敗兩次士卒殺傷無數俄人懼遂與拿破崙立和約拿破崙偽語俄君若平歐洲我願與君共之君其努力以助予也可時拿破崙年三十九歲為歐洲第一雄主而回憶十二年前不過一末弁耳豈知至此而揚眉吐氣武功之盛震古鏖今哉而拿破崙猶以為未足仍欲與英為難乃先分命各國不准往英國運售貨物以困之英人計曰爾既與我為難我即與爾屬國為難乃命將弁往封各國海船亦不准向他國運售貨物諸國不能敵英皆大受困拿破崙既平諸國則並撤其君位而分封其兄弟於意大利奧大利亞西班牙等國西班牙人心甚不服暗約與國潛與英通先是英與法人戰皆在海中並助俄奧等以餉銀共敵法人今又許借兵助西班牙葡萄牙於陸路以除法人時一千八百八年也拿破崙自西班牙率兵三十萬以拒英英兵退歸於船奧人聞英人之來也潛師以攻拿破崙之後英人既退拿破崙折回又敗奧人復罰其銀無算次年英派大將軍凌志屯戍西班牙前後數年曾無一敗英名大振一千八百十二年俄皇識透拿破崙之計不願助法而拿破崙恐其復合於英決意伐俄時拿破崙有精卒一百二十五萬除留守法國並牽制西班牙之外尚有六十萬人意圖直至俄之墨司哥古都詎俄人定計不與之戰而漸次退師即退則陸續預將師行之地焚燒一空較之堅壁清野而又過之法兵進不得戰退無所據俱饑餓不能興及至墨司哥死亡迫半俄人尚不欲法人入其京遂與之戰死者又十萬人然尚未分勝負也次日俄兵又退法人喜入其城以為可安枕而卧矣言料入城四望寂無一人

須臾四處火起不留片瓦拿破崙大懼倉卒退而兼俄地苦寒飢凍而死者尤衆俄人復自後潛隨之殺傷無算及出俄境法兵只餘八萬而已拿破崙既敗回國不念無面目見江東父老之恥復請法人助之而下令國中選丁壯年十八歲但長五尺一寸即令為兵未幾又得兵二十萬然尚不能敵諸國之兵也時則俄已與普國立約奧亦與馬特苦於國之輜重為法所掠置乏已其英人乃出英銀千萬磅助之瑞典亦來聯計法國之北衆小國合計有兵百萬法國之南西班牙國有英將威凌屯率兵十萬戍之及拿破崙兵出遂與接戰據拿破崙而歸仍稱之為皇而放於艾利拔海島此島周圍止二百里每年饋銀十萬磅以供用度仍以法兵四百名護之法國舊王仍復位歐洲各國始相安如初乃甫十閱月而拿破崙私遁至法國法兵仍樂為之用舊王不能敵而仍退位列國知不能安謐復相與立約選精兵百萬以備之時英普二國僅有兵二十萬法則方十三萬拿破崙欲乘英普未合之際先攻英軍遂進逼威凌屯威凌屯部下僅有六萬七千人拿破崙率兵八萬趨之馬步隊大小砲位無不全備戰八點鐘之久英兵死者甚衆而威凌屯勇氣愈奮普國兵間有戰遠咬號筒拿破崙急命精兵由左右兩翼包抄以為威凌屯必將退舍也詎威凌屯不但不退而且縱兵擁進反冲拿破崙之兵普兵已到拿破崙知不可支急遁回京時一千八百十五年也再令國中調兵三十萬奈法人實已竭蹶拿破崙無可如何且城外敵兵聲勢洶湧不得已自投英兵船求英皇准其居於英國再不為英王不許復幽之於錫利那海島至一千八百二十一年拿破崙卒於是島年五十二歲方其為皇帝之際所作所為非真有害於民也其心爾以民為邦本凡事宜徇衆心且在昔之民受困於上為戒故事事期順民心故自是以後多民主之國然而心高志傲好戰害民此其所以一敗再敗而不能復振也雖然拿破崙出而歐洲各國不安逐日徵兵籌餉國置民窮拿破崙敗而被獲則各國始慶幸然則拿破崙亦誠人傑哉特是兵凶戰危古有明戒安有窮兵黷武而能享長治久安之樂者拿破崙誤矣然前之遠泛五洲各海為大商者惟荷蘭

國為最不意自拿破崙亂後今皆改屬於英且英由是愈益興盛豈天以拿破崙之禍啟英歟雖然英獨富強而能與當時列國俱以好戰為戒各安疆場各保邊陲直至今日共享太平之福則又未始非拿破崙之功也
噫

俄皇大彼得傳

英人李提摩太附

嗚呼國之興衰雖曰天命豈非人事哉方俄羅斯之受困於人也距今才二三百年耳昔何以日蹙百里今何以雄跨兩洲昔何以守株一隅今何以帶甲百萬然後知故君彼得之奮發有為者其功烈之留遺為至深遠也試繙西史為有國有家者清夜之鐘迷津之筏焉表見皇后麥當雅氏生皇子二伯曰斐優劣仲曰愛繁生公主六麥當雅氏薨繼娶后乃他麗姬氏生皇子一即諱彼得者也生公主二虎辣西施謝世兩后之母族競助其女之所生竟成兩黨曰尋干戈斐優劣亡於陣愛繁以次當得立故其黨猶擁戴之然愛繁體弱而性魯不能承大任乃他麗姬之黨勢雖式微而彼得聰明英武頭角嶄然俄人歸心焉遂奉以繼帝位尊其母乃他麗姬氏為太后垂簾聽政從此外戚擅權勢傾朝野太后之養父麥特非失早生得罪戍邊太后赦而還之又廣樹其黨羽同執國政固自以為根深蒂固徧國中莫不喜也已麥當雅之六公主中有名柔髮野者性情剛烈器識宏深芳齡二十有六矣憤母之專權弟之弱以為昔者先皇之女剖開亞裏曾憫其兄之懦因輔之為帝同理國政彼女子也吾女子也吾何為獨不然柔髮野之所與游者又多屬智士王問其壯志更多方勸勉以勵之遂在簪笄中立愛繁彼得並為俄帝而用人行政之大權則柔髮野自掌之二帝拱手聽命而已創為大寶座甚高不可攀其形如品字二帝聯坐於外中空而障以紗柔髮野獨坐於內則障以羅每大朝會三人各登寶座君臣所目見者祇有二帝而不知目力之所不及者又有一帝也制一奇矣馬四克城俄之舊都也至今寶座歸然獨存以示不忘柔髮野掌國既

父厭宮幃之寂處未能暢其欲也先遍遊於境內名山古刹將皆必有車轍馬跡焉聞有賽會遊觀之事必親舉玉趾以為娛樂猶以為未足謂該利辛王予所封也使之遠約波蘭國意大利國奧大利亞國同尋盟好而徵師以擊土耳其國且將以次及於滿洲蒙古地西歷一千六百八十七年該利辛王率兵十萬先驅將軍賽敵樓肥滋以兵五萬繼之至土耳其之克拉迷亞與土師遇俄兵陳於平壤土兵列於山顛大有登高臨下之勢及戰俄兵以失地利故死亡甚眾既而屢戰屢敗狼狽而歸該野坐賽敵樓肥滋以遷延觀望失律喪師之罪革職遣戍而命將軍賽帕統其軍一千六百八十九年春復命該利辛王督同賽帕統兵再攻土耳其師至盆兒喀距克拉迷亞尚有數程已與土師遇該利辛王等倉皇接戰主客之勢既殊勞逸之形又異依然大敗而還該野不知下詔罪己反竭力彌縫揜飾於該利辛王回軍之際不但不正失機之罪尚親迎於郊而勞之彼得頗不善其所為而該野不顧也甚且諱敗而為勝命衆高抬神像行俄俗迎勞勝軍之禮並許該利辛王及總兵官以次進握其手而示寵異又徧賜美酒以通殷勤彼得得知之大怒以為吾姊悖謬至此朕獨何心擁此空名之帝座為即日棄國避居鄉僻間愛繁雖在位顧漠然不加喜戚於其心誠愚矣哉該野既敗於土不敢覬覦滿蒙地旋與中國盟於俄慶司克訂立條約舉昔日所占黑龍江一帶之地還之中國其時強隣偏處亦漸蠶食其疆土該野不但見凌於亞細亞洲之國又屢辱於歐洲以致國勢日促民不聊生內治不脩外侮薦至此古人所以貴戰勝於廟堂也

彼得幼時好為搗鼓之戲淵淵作金石聲好舞刀試劍雖不能悉中繩墨而擊刺亦頗靈捷恒與朝臣之子結為小友又號召軍民僕圉之子數十人仿照歐洲之法排演陣式教以洋鎗其翻新出奇處往往出人意表有不合程式者或偽斬以徇或予以責懲而懲其能者不吝重賞故受責之人痛哭交流不肯輕去又立表為測量法並率領衆孩壘土為炮台接以營壘遂分其衆為兩隊半作寇盜半作官軍彼得自執令旗指揮緝捕及

戰竹竿木棍如風馳雨驟官軍勝則鳴鼓督陣親提劍以追賊官軍敗為多受傷而死者已亦與之俱死事雖兒戲而激勵衆人之妙用已具於一心矣既從德國求得典冊心好之而不能解其師作陶名士也教之誦習為之講說往往僅三數語耳彼得已心領神會言下大悟每當讀書微倦作陶高聲朗誦并隨處闡其文義彼得聽之若不經意者然及至問焉則對罔不當於理作陶愛其天資英敏且落落有大志恒極口獎勵之且為言子之曾祖哀蘊留心經典陰符兵法莫不周知今子性情品概畧與相類非繩武之神孫與至如子之祖若父皆雄傑果毅酷好用兵攻城取邑日不移晷故能開疆拓土幅員倍於昔日俄國受益滋大於是師詳述之彼得敬聆之其銳志蓋與卒俱長矣言畢臘丁荷蘭日耳曼諸語聲入心通不拘長調胥能娓娓言之噫是益奇矣彼得性畏水雖小橋不敢過稍長率諸小友習水嬉於湖中又得荷蘭航師之指教遂能乘小船以客與乎中流倘得一帆風順萬里浪不難破也乃他麗姬太后懼其失足止之不可弄髮野公主貪攬國權欲據皇位以彼得雖已遜國而年日壯健且多材能心甚畏之密與寵臣恰六必帖謀以兵圍彼得之居盡誅其左右而幽其母乃他麗姬於冷宮流其師作陶於遠裔彼得將自殺矣兩武弁護之突圍而出逃至脫六伊薩國人皆曰是真主也朝臣軍民從之者如歸市彼得遣使告其甥索寵臣恰六必帖弄髮野懼見誅乃謀於主教主教命殺恰六必帖而以兵錮禁弄髮野於山寺使使迎彼得入都即帝位以愛繫為弄髮野所立且不慧故莫之顧焉彼得智勇兼備秉性精明久歷憂危愈增材藝加以親賢禮士政治日新風俗丕變而其經綸之富器識之宏尤為歐洲賢主中首屈一指惜其不自尊貴好微服作狄邪游至馬士克舊京流連風景樂不思歸細行不矜終累大德故恒不免於君子之譏云

彼得志在富強於水師尤極留意往往親登兵艦督率駕馭常遠至阿根足海道太后出自冷宮以彼得屢犯風波不測之險戒之曰我國歷代皇帝從未一見海水汝何輕身若是彼得不聽當微服出外之際嘗與商民